

Terms marcants : l'onn da rapport è stà in onn d'impurtanza spieziala per la Rumantschia

Autor(en): [s.n.]

Objekttyp: **Article**

Zeitschrift: **Annalas da la Societad Retorumantscha**

Band (Jahr): **110 (1997)**

PDF erstellt am: **30.06.2024**

Persistenter Link: <https://doi.org/10.5169/seals-236296>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern. Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden. Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Terms marcants

L'onn da rapport è stà in onn d'impurtanza speziala per la Rumantschia.

Il 10 da mars ha il pievel svizzer acceptà la revisiun da l'artitgel da linguas en la constituziun federala, l'art. 116 CF, e quai cun 76% da las vuschs. Stupents resultats ha la revisiun cuntanschì en il Grischun central, en la Val Müstair, l'Engiadina bassa, l'Engiadina'ota ed a Cuira. En vista a las activitads dal „Comité per combatter igl artechel da lungatg“ è era il resultat en Surselva cun 68.5% legraivel. Il nov artitgel oblihescha la confederaziun ed ils chantuns da promover la chapient-scha ed ils barats tranter las cuminanzas linguisticas ed el dat al rumantsch il status da lingua uffiziala da la confederaziun en ses contacts cun persunas ed instituziuns rumantschas. Er sche l'artitgel mussa vigur cumplaina pir cun la lescha federala davart las linguas uffizialas, ha il bun resultat tuttina gia uss effects positivs. Il pievel svizzer ha documentà sia voluntad per ina Svizra multilingua e per il rumantsch. Da vart da las autoritads federalas, da l'administraziun ed er dad organisaziuns ed instituziuns privatas pudain nus constatar ina nova sensibilisaziun ed in nov engaschament.

Il 2 da fanadur ha la regenza grischuna prendì ina decisiun istorica davart il rumantsch grischun. „Sch'il chantun sa drizza a l'entira populaziun rumantscha, fa el adiever dal rumantsch grischun. Sch'il chantun sa drizza a regiuns (intschess idiomatics), a singulas vischnancas u a singulas burgaisas e singuls burgais, po el far diever dals idioms.“ Cun questa decisiun è il rumantsch grischun facticamain daventà linguatg uffizial dal chantun. Cun decisiun dals 17 da dec. èn las directivas davart la translaziun da texts uffizials en rumantsch vegnidas adattadas a questa decisiun. A partir dal 1. da schaner 1997 succedan translaziuns da texts d'impurtanza per l'entir chantun Grischun en rumantsch grischun. Ils idioms restan linguatgs da scola. Dentant: „Fin la fin da la scola populara duain vegnir elavuradas infurmaziuns e tshertas enconuschientschas passivas davart il rumantsch grischun.“ La suprastanza da la Lia rumantscha ha chapientscha per il proceder precaut da la regenza en connex cun la scola, era sche la retschertga represchentativa mussa gist per las scolas in grond'acceptanza. Sch'il rumantsch grischun vegn duvrà adina dapli en las administraziuns centralas, sto el la finala er avair access en scola.

Il 23 da matg ha il cussegl grond decidì la contribuziun per l'Agentura da novitads rumantscha. Il 7 da zercladur è vegnida constituida la fundaziun che duai realisar quest'agentura. Malgrà difficultads èn las preparativas progredidas fin il december uschè lunsch, che l'agentura po cumenzar cun sias lavurs l'entschatta dal 1997.

Ils 5 da november ha la Gasser Media SA communitgà sia intenziun definitiva dad edir La Quotidiana a partir dal schaner 1997. Cun quest project vegn in vegl postulat rumantsch realisà. La LR n'ha mai vulì daventar editura da gasettas, ella ha dentant adina – ed ils ultims onns cun intensità e cun projects concrets – punctuà ch'ina quotidiana è realisabla e ch'ella è indispensabla per la derasaziun e l'innovaziun dal linguatg. La LR giavischa al project prosperità e spera che tut las forzas possian vegnir unidas per garantir a La Quotidiana in avegnir.

1996 è era l'onn dals reglaments per l'adiever uffizial da linguatg sin plaun communal. Suentar la lavur da pionier en Val Müstair ed en Engiadina han vischnancas da la Surselva imità l'exempel. Er en Surmeir èn las discussiuns per francar il diever dal rumantsch sin plaun communal vegnidas iniziadas.

Durant l'entir onn han activitads festivas fructifitgà la lavur. La Romania ha festivà ses 100 onns d'existenza, l'Uniun rumantscha da Surmeir ils 75 onns, l'Uniun da scripturas e scripturs rumantschs e la Cuminanza rumantscha da radio e televisiun lur 50 onns. Ellas han fatg quai cun publicaziuns festivas, cun occurrenzias spezialas, dentant era cun discussiuns e reflexiuns davart l'avegnir. Las perspectivas èn favuravlas. Concepts èn avant maun e la populaziun, era la giuventetgna, demussa interess ed engaschament.

Cun la fin da l'onn prenda Chasper Pult cumià suenter 5 onns sco president da la LR. El daventa manader dal „Centro culturale svizzero“ da la Pro Helvetia a Milaun. La suprastanza engrazia a Chasper Pult per la forza, la creatività e la gronda cumpetenza comunicativa ch'el ha mess a disposiziun a la LR sco president. Ella giavischa ad el tut il bun en ses nov uffizi. Al nov president Jost Falett dat la suprastanza in cordial bainvegni.

La lavur, documentada en quest rapport, vegn decidida dals organs, per la pli gronda part vegn ella dentant realisada da las collavuraturas e dals collavuratur da la LR.

Grazia fitg a tuttas e tuts.

Suprastanza LR